

Timoti saro peba oweria ie Pauro ro gemeiriai-ro

¹ Mo masiro Pauro ie, nedi peba titi ro mo ro nisioidiro. Mo Iesu Keriso ro Godi ubi ato nohodowa-ro nou kotiodorai dubu to ararasoro ri. Godi ro keba ia se ta-garo ibo urubia keremiro ama-imio-ri, ina nedi keremiro ro Iesu Keriso aboudo ie.

² Mere dubu Timoti, oro mo giropu mere ie, nedi peba titi ro mo ro oro ia aboto nisioidiro. Mo ubi ie oro sapuwo to nimo Abera Godi ro Iesu Keriso mutu neitiro aboudo wisa tato kiwarebai, natonato, miro mutu oro abato ba-miamotiti.

Pauro ro Timoti pupuwo oweria gomia

³ Mo ro nedi dubu woko na-nemesioidirotiti Godi, oro sapuwo to eso oweria nou aboto mo ro aise niarotiti. Mo ro Godi woko na-nemesioidirotiti, mo ro keremasibai ie ibo mo ro ubauba tanaro isioidiro pua, mo nasaio ro idaibo mino to emesioidirotiti-mo. Duwo saiki oro sapuwo to Godi aise nararatorotiti.

⁴ Mo oro ro idobi edi tau ato na-nemerete, oro mo ro aise nemaragoidiro-ro. Mo oro kowea sogoi ro nowatititi, mo oro ro kamade kowai aboto.

⁵ Mo umoro ie oro aramu abere Roisi kimibiria mutu e, ibose oro mamu Iunisi kimibiria orobo ie, neitiro morobise kimibiria orobo teibo ie. Ina oro ro morobise kimibiria toworohuti. Abora

mo ro morobise to ti-nimibiria ibo oro Iesu Keriso ower a rido morobise to tirarebidiro.

⁶ Ina noudo ie oro Godi ro beda korosa gomia-ro nou urubia pupuwo kimowaititi sapuwo to, nou auna ba-dowai. Mo tu edi tau ato nitomai oro eputa ato, iedi korosa ro Godi aboudo ie oro ro nato gomidai, abora oro abato towamo.

⁷ Nou auna ba-dowai mabu Godi ro tere urio emeiriai pua nimo aboto, Tarena Urio nou ro gemeiriai-ro nimo aboto nimo pupuwo kimowaititi sapuwo to, ina urubia nirimagare imati ri, ibose durupi kimododidiro aboto.

⁸ Ina noudo ie Abera Naramu edi mea ower a ro korowauti sapuwo to, siripo eremati mam o. Mo ro nedi mea ower a ro Iesu sapuwo to urubia na-nimowautiti, mo dibura to nou mabu ato nede a-rimo. Mo Iesu ro nemamuai tu ra sairo ra seni to nou ri nemotohiti-rimo. Kaupoti oro siripo oi ate, mea ower a kowauti sapuwo to mibo maumo ato atu se mou-rido. Oro Godi ro pupuwo ta-gomia-ro iedi tanaro ro nou kisioidiro aboto.

⁹ Nimo womu tato womu tato pamo rido Godi ro keba ia se ta-niapopo-ro ina nimo nou ro aise nirapoi-ro tarena urubia to orowomidiro ri. Godi ro edi tanaro ro na-gosioidiro nou simara ubi to, ibose wisa tato nirimagare maumo ato gosioidiro. Ibo pua nimo ro meamea tanaro kisioidiro, iedi mabu ro neido nimo nou ro ubauba aboudo nato kiapopo. E e nimo nou ro idaibo gabo rido irapoi pua. Nedi duriomoro gebari ro Godi ro ido to gosioidiro nedi wisa tato nirimagare ro Iesu Keriso abato ibose to gowamo nimo sapuwo to.

¹⁰ Godi ro gabo ibo gosioidiro, ina abora nou e nedi gabo ro Godi ro paea se noti gowapotai-die nimo aboto. Iesu Keriso gabo nouse ie nu nimo ubauba aboudo kiapopo dubu nouse ie. Wisa tato nirimagare nou ro durupi to noti gowapotai-ro. Iesu Keriso edi pupuwo korosa ro imese pupuwo ia ie, pamo edi pupuwo ro Iesu ro ta-gowaruria. Abora nedi tau ro nato womu tato womu tato keremiro gabo urubia aboto Iesu ro ta-godobura-die. Nimo kiapopo dubu Iesu Keriso edi mea oweru ro urubia na-nimowautititi-dumo gabo nouse ie paeapaea noti goi-die.

¹¹ Ina nedi mea oweru ro sirio urubia kimowauti aboto mo Godi ro nou ri notuputai-ro. Mo ibose nou ro narapoi-ro Iesu ro kotiodorai dubu to ararasoro ri, ina mea oweru Iesu sapuwo to urubia itamudiro ri.

¹² Ma-dowea nedi woko sirio ro mo ro na-nisioidirotiti temeteme nou mabu ato niaurititi. Kaupoti mo siripo nato oi pua mabu mo umoro ie mo etu abato norodoromaidiro. Ina mo morobise to umoro ta-noi ibo Godi ro edi na giedea mo tu ato mo nou ro ti-nemowotoititi-die womu tato womu saiki namadi-orowateai-ri.

¹³ Mo aboudo nedi morobise oweru ro na-garatamudiro, urubia oro ro nedi atu oweru ro neito ditomu, arua oweru idabu mamo. Urubia oweru oro ro beda tau ato kimowauti ra, oro kimibiria Iesu Keriso abato se gi-iamo-ri. Kimowauti tau ato urubia babio nirimagare aise gi-imati-ri Keriso aboudo na-ororuwo-die.

¹⁴ Nedi morobise oweru ro oro Godi ro edi na gomia-ro nouse ba-demotoititi. Oro abato Tarena Urio timidiroititi oro nou ro

ama-owarebai-ri nedi mea kitamudiro owera ro mea se kemowotoi aboto.

¹⁵ Oro umoro ie Eisia duriomoro gebari rido edi kimibiria urubia ro na-gou-rimo Pugeresi ra Hemogene ra neitiro mutu mo neio ro aise nebedidiro-rimo.

¹⁶ Kaupoti Onesiporo timase ie. Mo dibura ato na-nirohotiti nou ro siripo ematiti pua, sirio tau naraturiotiti-ro, nowaititi pupuwo. Ina noudo ie Onesiporo nou urubia mutu Abera Naramu ro neibi aboto mea nirimagare tanaro ba-misioidiro.

¹⁷ Onesiporo Roma sabowa to beda tau ato gorowateai nou eremasebidiro pua aise gemobodiai mo osora ri womu tato mo nou ro ti-nowea.

¹⁸ Abera Naramu ro womu saiki ato nirimagare tanaro Onesiporo aboto ba-misioidiro. Oro umoro kebase ta-goi, Epesesi sabowa ato na-nomidiro mo nou ro auna se nowarebidiroiti.

2

Koko se gi-iwotoi-ri Iesu ubi tanaro kisioidiro aboto

¹ Nimo Iesu Keriso ro wisa tato nirimagare ti-nimiotiti-die koko se kirimowotoi aboto. Ina mo mere Timoti, owera oro aboto ibo ie koko se ba-diwoitoi.

² Mo ro beda owera to nitomutiti, oro ro ta-irowidiroiti urubia sirio sosoro gabo ato. Nedi karatamudiro ro oro ro na-imadetiti morobise urubia oro ro neito ba-ditamudiroiti. Ina nedi owera ro neio ro ioudo amadima-amudia-ri oro aboudo, ina neio

modobo amadimo-oi-ri arua urubia kitamudiro aboto.

³ Mibo, temeteme maumo ato ibo ba-dou, Iesu Keriso mea boso koroho dubu beda sosoro koroho ra ibo ba-dirohotiti.

⁴ Boso koroho urubia ro duriomoro tanaro aboto auna se imaragoidiro-ri pua, mabu neio ubi ie boso eputa dubu kamade kowaititi.

⁵ Ina ata pikisa owera ibo ie urubia hio na-orowario-dumo, neio ro korowiro sabi kiauri dubu owera kirowidiro tato, ina nedi korowarario ro nou sapuwo to wisa imade-ri pua.

⁶ Ina ata pikisa owera ibo ie, pari ato woko pupuwo to etio ro isioidiro-dumo, pari namabu kisuwoduti ato modobo ie kebase neio ro kiasio.

⁷ Timoti mo ro beda owera nemabuti maumo mea se ba-demaragoidiro. Oro ro maumo mea se nama-osora-ri oro Abera Naramu ro maumo kimaragoidiro patu nato amadi-emowapotai-ri.

⁸ Oro ro Iesu Keriso ba-demaragoidirotiti. Nou Abera Godi ro pamo rido ta-gowameai-ro. Nou Deibidi nasa ie nu gu ioudo orobu-die. Nedi mea owera ro mo ro na-nimowautiti Iesu Keriso sapuwo to,

⁹ mo dibura abato koko tau nou mabu ato niaurititi. Mo ro urubia dubu kopia sosoro ie tu ra sairo ra seni to aise nemotohiti-rimo. Kaupoti Godi edi owera ro ata dubu ata ro modobo pua seni to kemotohiti.

¹⁰ Ina noudo ie Godi ro edi urubia girapoi-ro neio sapuwo to mo ro sirio mibo patu niohidirotititi. Modobo ie neio ro Iesu Keriso sapuwo to kimibiria ina wisa tato keremiro kimade, ina mea ia se korowomidiro womu tato

womu tato. Nedi tanaro ro kororosioi diro
sapuwo to mo ro sirio mibo patu nou ri
niohidirotiti.

¹¹ Nedi ower a ro morobise ower a ie, nimo nou
mutu korowaburai ato, nou mutu ibose to
anama-irowomidi-ro-ri.

¹² Nimo pupuwo se korowotoi koko tau kiauri
ato, nimo ro saiki ata eputa urubia to Iesu mutu
anama-irowomidi-ro-ri.

Nimo ro Iesu karatio ato, nimo nou ro ibose to
nama-iratio-ri.

¹³ Kaupoti nimo ro Iesu mau kesebo ato, nimo
nou ro wisana mau isebo-ri pua, mabu nou beda
sosoro ra nou karatidiai modobo pua.

Woko dubu ro Godi kamade kowaititi modobo ie

¹⁴ Timoti mo ro dese to edi ower a ro na-niatiti
urubia oro ro neito ba-dirobidi-ro inaina aise
ba-dimowautiti. Godi sosoro gabo ato umoro
ower a pupuwo to ba-dimowauti ibo, ower a
maumo sapuwo to keremaro arua urubia mutu
ubauba tanaro ie. Keremaro urubia ower a edi
urubia ro na-irowidi-ro-dumo neio iwarebai-ri
pua, ubauba kiwai ie.

¹⁵ Oro pupuwo ba-dasibai woko kosioidi-ro
aboto ina noudo ie oro Godi ro nato ama-apoi-ri
mea woko dubu to. Godi woko etio ro
kemesioidi-ro ra neio siripo eremati-ri pua,
urubia neio ro itamudi-ro-dumo morobise
tuputupu gabo. Ina oro ibose idaibo tanaro nou
ba-disioidi-ro-titi.

¹⁶ Timoti arua urubia ro ubauba ia ower a
na-iwasorotiti-dumo, neio ro Godi owautiti pua.
Idaibo urubia aboto aradabu mamo, mabu nou
e idaibo ower a to etio ro iremowautiti-dumo
neio Godi aboudo musomuso oititi-dumo.

¹⁷ Neio edi kitamudiro oweru ro na-iworohutiti-dumo, nou korobodorai ie, urubia kimibiria ubauba aise kiwai ie. Neio edi oweru ro kikoni sosoro ie koiriai modobo pua. Himinase ra Piratusi ra neitiro idaibo dubu teibo ie neitiro ro imowautiti-do urubia bagea oweru.

¹⁸ Neitiro teibo morobise gabo rido ta-garaubai-do. Neitiro ro urubia ibo itamudiro-do urubia Godi ro pamo rido ta-giwame-ro. Neitiro ro urubia idaibo oweru to na-itamudiro-titi-do arua urubia kimibiria tanaro ubauba imowaititi-do.

¹⁹ Kaupoti Godi edi morobise kimibiria urubia ro neio kimibiria mutu koko se torowotoi. Neio idaibo sosoro ie sesere posi moto gebari neio ro owotoititi-dumo. Ina nedi posi ro nato Godi ro titi ta-giatiti ibo, 'Abera Naramu Godi auna umoro ie nu simara urubia etio ra.' Beda urubia ro karo ra ibo mo Abera Naramu ubi tanaro nisioidiro-titi ina idaibo urubia ro modobo ie ubauba tanaro kimeseruti.

²⁰ Namabu sirio dubu moto ato namabu erere ro kiamo ie, ibose nou moto ato ohona kiaremo namabu kiamo ie. Arua namabu gorodi rido gisioidiro-rimo arua siriba to ie, ina arua komapi to ie ina arua ota to ie. Gorodi ra siriba ra to edi namabu ro gisioidiro-rimo neio awawo tanaro sapuwo to iamotiti, meamea ohona neito imowititi-dumo. Arua dorogora se mereki komapi rido edi na gisioidiro-rimo ohona momoso, soro neio iaremo na ie.

²¹ Ina noudo ie urubia dubu ubauba aboudo marea tato na-orowai, nu gorodi mereki sosoro koi ie. Soriomu tau ato iedi mereki ro ohona neido modobo ato kiho ie. Idaibo dubu nu

keremiro tarena ie. Nou ro eputa dubu ubi tanaro modobo ato kemesioidiro ie. Ibose nou modobo ta-goi meamea tanaro kisioidiro aboto.

²² Ina nou do ie Timoti, orio domere ro edi ubauba ubi tanaro sirio ro na-isioidirotiti-dumo, neio aboudo ba-dodaudio. Abera Naramu etio ro emowabutiti-dumo morobise giropu mutu neio ro oro ia mutu modobo ie meamea tanaro binio to kiosora. Idaibo tuputupu tanaro kisioidiro, morobise tanaro kisioidiro, urubia nirimagare kimati, sirio tau miro to korowomidiro.

²³ Kaupoti oweru keremowameduti urubia, kimaragoidiro tato urubia, neio ro dorogora se oweru katamuai ato, neio mutu aradabu mamu. Mabu oro umoro ie neio ro oweru kididi ie.

²⁴ Oro etu ro ararasoro Abera Naramu wisa tato woko dubu to, arua urubia mutu keremaro modobo pua. Kaupoti oro ro modobo ie tanaro mea se kisioidiro imese urubia aboto. Oro ro modobo ie urubia morobise oweru to kitamudiro. Ina ibose etio ro isioidiro-dumo ubauba tanaro oro aboto, serawo samo to oi mamu neio aboto.

²⁵ Etu ro koi ra masawe oro aboto, wisana nedi dubu ro muro oweru to gi-emowameai-ri. Oro ro idaibo tanaro kisioidiro ato, etu umoro ra nedi karasaubuti kitamudiro dubu ro Godi ro gabo kemodobura ie ubauba aboudo kerewesegerai aboto morobise oweru imibiria ri.

²⁶ Nu kimaragoidiro patu kiwameai ie, ina Satani namusu rido imese karahua ie, taie nou ro Satani edi ubi tanaro ro aise isioidiro-ri pua.

*Womu tau ato urubia ro ubauba tanaro
amadimi-isioidiro-ri*

¹ Oro umoro koi modobo ie ibo womu tau ato etou tanaro amadimo-ororosioidiro-ri. Nedi womu tau ro nato koko tau amadimo-ororosioidiro-ri.

² Urubia sirio simara durupi auna se amadime-eremaragoidiro-ri, arua urubia nirimagare imati-ri pua. Neio auna se mani aboto amadimi-imaragoidiro-ri. Neio auna keremowabu oweru karo ie. Neio abato keremowabu auna se ama-owamo-ri. Neio ro urubia oweru to ubauba amadimi-iwaititi-ri. Neio mamio abeamio oweru irowidiro-ri pua. Neio ro urubia aboudo meamea namabu kimade kawa imadetiti-dumo, ina neio ro wisana meamea tanaro kisioidiro pua neio aboto. Nedi urubia ro Godi tere kemati tato urubia ie.

³ Arua urubia neio ro nirimagare imati-ri pua. Ubauba tanaro ata ro nou aboto kosioidiro ato, iedi dubu ro nou ro adabuti-ri pua koporeai sapuwo to. Neio ro arua urubia ipi oweru amadimi-imoworohuti-ri. Ubauba tanaro kisioidiro aboto durupi idiobuti-ri pua. Neio serawo koi ato urubia neio ro temeteme aise amadimi-imio-ri, kiageawado modobo pua. Neio auna masawe ie urubia ro meamea tanaro kisioidiro ato.

⁴ Neio ro urubia amadimi-iasouti-ri arua urubia ro ubauba iwaititi ri. Neio ro kimaragoidiro tato tanaro hio to amadimi-isioidiro-ri. Nedi urubia ro keremowabu mutu amadimi-iaupai-ri. Neio ro binio to amadimi-iosora-ri kamade nakara se korowaititi aboto, neio ubi tato ie Godi kamade kowaititi.

⁵ Godi ubi tanaro kisioidiro neito aratigi-dumo, kaupoti morobise pua, ohu meana ie, maumo ubauba ie. Godi abato edi pupuwo korosa ro na-owamo-die urubia ubauba aboudo edina ro iwesegerewadotiti meana to, nedi pupuwo korosa ro neio ro huru amadime-emoworoho-ri. Oro aboto owera ibo ie, idaibo urubia ba-dimowagegeidiro, neio mutu idabuti mamu.

⁶ Arua urubia idaibo sosoro urubia ie, duboi moto to karatigi mino to kodouti ie, koko tato mamio isaubuti ri. Nedi mamio ro ubauba nakara se ohu ra maumo ra aise iremotomotiti-dumo. Ina mamio neio simara ubauba ubi ro itowoutiti-dumo sirio ubauba tanaro kisioidiro aboto.

⁷ Nedi mamio ro sirio tau orio umoro aise iosoratiti-dumo, kaupoti nedi morobise owera ro na-owamo Iesu sapuwo to mea se keibimai aboto modobo pua.

⁸ Keba ia tau ato Mose ro Godi edi woko ro na-emesioidirotiti, nou gabo pakani dubu teibo ro Iane ra Iambere ra ro egea mere se ta-owasioutiti-do. Ina abora nou e idaibo sosoro tanaro neio ro ororosioidiro-dumo. Morobise owera Iesu Keriso sapuwo to, ubauba urubia ro gabo ibo egea mere se temoputi-dumo urubia sirio ro kimibiria aboto. Idaibo tanaro beda urubia ro isioidiro-dumo, neio kimaragoidiro ubauba kebase ta-gimowai, morobise kitamudiro aboudo imese ta-giretei.

⁹ Nedi karasaubuti kitamudiro ro neio ro tuturu to owou-ri pua, saiki ata ama-eresebuti-ri. Mabu neio ro edi bagea kitamudiro to na-itamudiro-dumo, urubia sosoro gabo ato isioidiro-dumo neio urubia ro

amadimi-ieibimai-ri, iedi pakani dubu teibo ro keba se beda sosoro gieibimai-marimo.

Pauro pupuwo oweru ie Timoti aboto

¹⁰⁻¹¹ Kaupoti oro bagea kitamudiro urubia sosoro pua, mo edi kitamudiro ro oro ro tibodoro. Oro umoro kebase ta-goi mo beda keremiro ato nimidirotiti. Mo beda ubi nemamotiti kosioidiro aboto, mo kimibiria tanaro beda sosoro nowaboititi oro auna ia umoro ie. Ibose koko tau ato mo beda mino to nirimowotoititi oro auna umoro ie. Oro auna umoro ie mo ro urubia nirimagare beda mino to nimatiti. Iesu Keriso sapuwo to oweru na-nobodoroutiti, mibo sirio nou mabu ato noti niaurititi, oro umoro ie mo irorodiobuti pua, aise nirowautititi. Ina Entioko sabowa ato, Ikoniam ra, Risitira ra mutu, nedi sabowa peteibi ro mo iato neio ro auna ia ubauba mino to noworohutiti-mo, oro auna umoro ie. Mo ro urubia aboudo ubauba temeteme ta-niaurititi sekere mo koko se ta-niwotoititi. Mo Abera Naramu ro ta-nowagarewadotiti-ro iedi mibo sirio ro neido.

¹² Ina etio ra ubi na-iamo Godi ubi tanaro kisioidiro aboto Iesu kobodoro maumo ato, nedi urubia ro temeteme amadimi-iauri-ri arua urubia aboudo.

¹³ Ibose ubauba tanaro kisioidiro urubia, karatigi urubia mutu neio ubauba tanaro kisioidiro aboto imese ubauba ia amadimo-oi-ri. Neio ro urubia ubauba mino to amadimi-isaubuti-ri, ina neio urubia ro ibose to amadimi-isaubuti-ri.

¹⁴ Kaupoti neibi aboudo oweru ibo ie Timoti oro aboto, oro ro kebase beda mea oweru

garatamudiro, ibose oro ro iedi morobise ower a ro na-gimibiria, koko se nato dotoi. Ata gabo ato otobowa mamo, mabu oro umoro ie nedi mea ower a ro etu bi ro gatamudiro-birimo.

¹⁵ Oro umoro ie oro mere kainai rido womu tato abora, Tarena Buka ower a oro auna umoro ie. Iedi Tarena Buka ower a ro, oro nou ro mea umoro ama-omio-ri ibo oro ubauba aboudo nou ro ta-gapopo-ro, ina morobise mea ower a oro ro ta-gimibiria Iesu Keriso sapuwo to.

¹⁶ Imese ower a na-iamo Tarena Buka ato, Godi ro iaiwotiti-ro urubia aboto. Ibose nedi ower a ro nou simara korosa mutu e urubia kitamudiro sapuwo to. Nu simara pupuwo korosa mutu e urubia dubu ro beda ubauba kosioidiro ra, nou ro kemowapotai ie. Nedi ower a ro nou simara pupuwo korosa mutu e nimo ro beda ubauba tanaro nisioidiro-dumo, nou ro kimutuputuwado ie ibo nedi tanaro ro ubauba ie. Ibose meamea tuputupu mino to korowomidiro sapuwo to, nedi ower a ro nou simara pupuwo korosa mutu e nimo ro karatamudiro aboto.

¹⁷ Ina noudo ie Godi gabo etio ro obodoro-dumo, neio modobomodobo kiwaititi ie meamea tanaro kisioidiro aboto.

4

¹ Iesu Keriso ro imese urubia koto ama-iwai-ri, korowomidiro urubia, korowaburo urubia mutu atu se. Nou neito amadi-orowameai-ri, ibose Godi edi kiwabo i tanaro ro eputa dubu to nou ro ama-ararasoro-ri. Ina noudo ie Godi sosoro gabo ato ibose Iesu Keriso sosoro gabo ato, oro aboto mo ro nedi pupuwo ower a ro nou nemeiriai,

² mea ower a Iesu sapuwo to nou ba-dimowauti. Urubia ubi kirowidiro o ubi tato kirowidiro, ubauba tau ato o mea tau ato, aise ba-dimowauti. Urubia kitamudiro ato o kituputiwado ato, mea mino to gi-orowati-ri, serawo hio ito oi mamo. Ubauba tanaro etio ro isioidirotiti-dumo, neio oro ro modobo ie pupuwo to kimowapotaiddiro ibo, nu ubauba tanaro ie kisioidiro modobo pua. Ibose kimibiria urubia kimibiria tanaro pupuwo aise gi-iwaititi-ri.

³ Mab u tau amadi-ou-ri morobise kitamudiro ower a urubia ro irowidiro-ri pua, neio ro ubi tato amadimo-owea-ri. Neio simara ubi tanaro kisioidiro sapuwo to, orio kitamudiro urubia edi ower a ro kamade mutu nou amadimi-irowidiro-ri.

⁴ Morobise ower a neio gare goro to kiwodoro modobo pua, gare kiopai amadimi-iroho-ri. Nedi urubia ro neio ro karasaubuti totomu nou amadimi-imibiria-ri.

⁵ Kaupoti ower a Timoti oro aboto ibo ie, sirio tau beda tanaro ro kororosioiddiro ra kimaragoidiro mutu koko se gi-otoi-ri, mibo tau oro aboto amadime-ererehuti-ri. Ina mea ower a Iesu sapuwo to kimibiria tato urubia ba-dimowautititi. Ibose oro Abera Naramu ro beda woko aboto gemeiriai-ro, imese nou se ba-disioidiro.

⁶ Ina mo simara sapuwo to, mo keremiro Godi aboto imese naiwai, nio mo ro aupise ie kimeserai.

⁷ Mo pupuwo to mea se nirarioidirotiti, abora womu to ta-norowateai-die. Morobise ower a Iesu sapuwo to nouse ie mo ro koko se nou

norobidiro-titi. Ina abora nou e Godi woko mo ro ta-nemesioidiro-titi, ina nedi woko ro nou sapuwo to wisa nou ro ti-nemerebidiro-die.

⁸ Nedi wisa ro Godi ro amadi-aiwai-ri mabu mo nou ro mea tuputupu dubu to ta-napoi-ro. Iana koto saiki ato Abera Naramu nou se ie mea tuputupu koto kiauri dubu, mo ro nedi woko ro na-nemesioidiro-titi nou sapuwo to, wisa nou ro nato anamadi-omia-ri. Ina mo se pua, arua urubia nou korowameai sapuwo to auna ubi mutu teremotoi-dumo, neio ibose nedi atu wisa ro ama-imio-ri.

Erere umoro oweri Timoti aboto

⁹ Timoti, oro gabo pupuwo to ioudo ba-diosora-ro, modobo ie oro samo to kou mo aboto.

¹⁰ Oro mo ro nou mabu ato nemagege mabu mo nato ti-nomidiro. Mo Demasi ro dorogora mabu ato nebedidiro-ro. Nou ubi auna se iamotiti duriomoro ubi tanaro kisioidiro aboto, Tesaronika sabowa to nou ri godau. Ibose Kerese Gereisia duriomoro to ta-gou. Ibose Taitasi Deremesia duriomoro to gou.

¹¹ Ruka nakara se mo abato nou ro erediai-die, mo nou ro naiwidiro. Oro neito namadi-ou-ri, Mareko emesera ai ate, ba-dadabu ai-ro atu se ba-dou-rido, mabu mo woko mutu nou ro nowarebidiro-titi.

¹² Tikikasi mo ro Epesesi sabowa to ta-nemeiriai, nu nato omidiro pua.

¹³ Oro kou ato, mo kukamo ato koroidiro sedo tuturu Torowasi sabowa ato nemesera ai Karapo abato towamo, nou aboudo ba-dememidai-ro. Ibose buka sirio mo ro iato ta-nimesera ai,

ba-dememidai-ro. Burumukau takamai to edi buka ro gisioidiro-rimo, mo ro auna se neio nimaragoidiro.

¹⁴ Oro umoro kowai sapuwo to, auri kisioidiro woko dubu masiro Arekasanida, oro ro nou ba-dowaruwo. Mo sirio tau ubauba nou ro nowaititi. Nou ro edi ubauba na-gisioidiro mo aboto, nu wisa Abera Naramu ro ama-emowameai-ri.

¹⁵ Mea se ba-deremowotoi urubia dubu nou se ie. Mabua neibi ro Iesu sapuwo to kitamudiro owera urubia na-nimowautiti-bimo, neibi edi kitamudiro ro nou ro auna se ihoiotiti.

¹⁶ Mo kebase koto owera aro ri edi tau ato norobai-rimo, mo ata dubu ata ro owairiai pua. Urubia sirio mo aboudo aise gorowadau, mo neio ata ro emedio pua. Mo aboudo nedi korowadaudio ro na-gorowadaudio, Abera Naramu ro ba-mipisiamuti nou sapuwo to.

¹⁷ Kaupoti mo nou ia ro huru rido ta-nemotoburio-ro, mea owera karo aboto pupuwo nou ro nemowaititi-ro. Iedi erere owera urubia ro gou-rimo, modobo ie mo ro neio Abera Naramu edi mea owera ro neito imowauti ri, ibose neio ro irowidiro ri. Iedi tau ro nato mo kopia aboto ie, kaupoti iedi namusu ro nou aboudo Abera Naramu ro ta-nahua-ro.

¹⁸ Ubauba urubia ro ubauba tanaro kisioidiro ato mo aboto, Abera Naramu ro neio ubauba aboudo anama-owaguwotiti-ri, womu tato Godi ro kiwaboi tanaro Adiri sabowa ato na-owamo-die, ito mea se korowateai.

Nu urubia sirio ro aise ba-memowabutiti-mo womu tato womu tato. Ibose ba-mororosioioidiro-mo.

*Kamade owera Pauro ro gemeiriai Epesesi
kimibiria urubia aboto*

¹⁹ Mo kamade owera nemeiriai Pirisira ra
Akuira ra neitiro aboto, ibose Onesima aboto
nou moto urubia mutu.

²⁰ Erasita Korini sabowa ato omidiro, ina
Toropimasi mo ro Mireto sabowa ato temeteme
mutu ta-nemeserai.

²¹ Timoti, gabo ioudo samo to diosora-ro, auna
bukopu tau modobo pua keba se kereredea, oro
samo to korowateai modobo ie. Kimibiria
borubi nedi auna sabowa ro nato
na-orowomidiro, Euburu, Pudeni, Rinasi,
Karadia imese kimibiria urubia mutu kamade
owera neio ro emeiriai-dumo oro aboto.

²² Abera Naramu oro urio abato
ba-mimidirotiri, ibose wisa tato kiwarebai oro
abato ba-miamotiti.

Tareka Buka
Portions of the Holy Bible in the Bamu language of
Western Province, Papua New Guinea
Buk Baibel long tokples Bamu long Niugini

copyright © 2023 SIL Papua New Guinea

Language: Bamu

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2026-08-26

PDF generated using Haiola and XeLaTeX on 26 Aug 2026 from source files dated 26 Aug 2026

14d82267-f09c-5d69-a15a-8b9a709122b4